

## **DOMINGU XIII TEMPU KOMÚN – TINAN B**

### **Tema Domingu da-13 Tempu Komún Tinan B**

Maromak hadomi moris! Nia hakarak de'it maka moris! “Maromak hakiak ema atu la bele mate” (leitura dahuluk). Hodi ni Oan, nia salva ita husi mate: tanba ne'e mak ita agrade se nia iha Eukaristia ida-idak. Iha nia moris iha rai, Jezús nafatin defende vida. Evanjellu ohin nian haktuir mai ita epizódiu rua ne'ebé hatudu defeza ba vida: nia kura, nia foti sa'e. Nia liberta ema hotu, halo sira sai livre, fó ba sira dignidade no kapasidade atu moris nakonu. Ita hatene dehan ba nia katak nia maka ita-nia ksolok moris nian? Domingu da-13 selebra moris forte liu mate, selebra Maromak ne'ebé hadomi moris. Tanba ne'e furak liu atu iha selebrasaun lora ne'e nian ita halo moris hatudu nia fafurak tomak ho forma oioin: iha ai-funan nia fafurak, iha jestu no atitude sira, iha proklamasan Liafuan nian, iha knananuk no aklamasan, iha naroman. Durante misa tomak, hodi harohan, ita mantain konvikasaun ne'ebé espresa iha Livru Sabedoria nian: “Maromak la haksolok haree mate”.

### **LEITURA I – Sab 1, 13-15; 2,23-24**

#### *Komentáriu badak*

Livru Sabedoria nian hakerek tempu ruma molok Jezús nia mamaik. Ninia doutrina hakmatek liufali duké livru sira antigu liu nia, ho modu partikulár bainhira apresenta Maromak nia futar oin.

Anúnsiu ida ne'e tenke haklaken ho forsa, tanba kontradís ideia sira ne'ebé sei namkari katak, Maromak haksolok atu ema mate. Mate mai husi buat seluk, basá, “la'ós Maromak mak hakiak mate”. Nia, iha kontráriu, hakiak vida no fó ba umanidade, tuir ninia ilas. Nia restaura vida, bainhira iha perigu atu mohu. Nia fó vida bainhira nia lakon hanesan Evanjellu domingu nian ne'e fó sasin. “Ita halo ha'u moris”, salmista dehan. Tuir leitura dahuluk, salmu esprime esperiénsia kona-ba Maromak ida ne'ebé hakarak nia emar sira nia moris. Iha Jezús moris-hi'as, no ba ema hotu ne'ebé fiar iha nia, orasaun salmu nian hatudu nia lialoos tomak.

### **SALMU RESPONSORIÁL – Salmu 29 (30)**

Refraun: Nai Maromak, ha'u liban Ita-Boot tan Ita-Boot soi atan ha'u

### **LEITURA II – 2 Cor 8,7.9.13-15**

#### *Komentáriu badak*

Komunidade sarani dahuluk nian pratika tulun-malu no partilla entre sira, la'ós de'it entre membru sira maibé mós entre komunidade sira. Apóstolu Paulo husu ida-ne'e ba sira, nia organiza peditóriu ida iha komunidade sira ne'ebé nia harii iha Ázia Menór, iha Masedonia, iha Grésia atu tulun maun-alin sira Kreda Jerusalém nian ne'ebé enfrenta difikuldade sira. Inisiativa ida-ne'e korresponde ho orientasaun sira ba Kreda foun sira, tuir Apóstolu sira nia hahalok 4,32-35. Paulo justifika hahalok laran-luak nian ida-ne'e ho Kristu nia laran-luak rasik: nia maka modelu ba sarani sira no sira rasik simu tiha ona grasa barak husi nia. Jezús hanorin ba sarani ida-idak katak vida mak rezultadu husi hamamuk an no resurreisaun ita simu liuhusi mate. Nune'e sarani sira Korintu nian iha possibilidade atu koko grasa ne'ebé mai hodi hatudu domin ba maun-alin sira la'ós de'it ho liafuan no intensaun sira maibé ho faktu konkretu hodi renunsia buat ruma husi an rasik, domin ne'ebé fó tanba maun-alin sira nia nesesidade.


ALELUIA – kf. 2 Tim 1,10

Aleluia. Aleluia.

Kristu Jezús ita Maksoin sobu mate hodi Evanjellu halo moris nabilan.

EVANJELLU – Mc 5,21-43

*Komentáriu badak*



1. Maromak nia Reinu mak vida. Jezús la'o lemo rai atu haklaken Reinu no harii nia. Nia ko'alia no hala'o. Ninia fama halekar tanba kbiit ida suli husi Nia; ida-ne'e maka kbiit resurreisaun nian, Espíritu moris nian.

“Sai isin di'ak bá”. Jezús nia imperativu hatudu ninia domin ba feto ida-ne'e, restaura fali ninia dignidade, tama fali iha sosiedade ne'ebé esklui ninia moras; “sai isin di'ak bá” hanesan mós konstataasaun ida: ninia fiar soi nia, no Jezús haksolok ho ida ne'e. Kura, hetan isin-di'ak maka konsekuénsia ida fiar nian, bee-matan ba vida no ksolok.

“Hamriik bá”. Imperativu daruak iha Evanjellu ohin nian dinámiku liu no tradús Maromak nia hakarak boot atu haree ema moris, ninia domin inkondisionál ba vida. “Nia toba”, iha “mate nia dukur”... estadu ida ema nian ne'ebé Maromak hakarak atu ita sai husi nia, estadu ida husi ne'ebé Jezús mai atu salva. “Ha'u dehan ba ó [‘ordena]’:”hamriik bá”. Liafuan’hamriik” fó hanoin ka evoka kona-ba resurreisaun, moris foun nia mamosuk, Maromak nia domin ne'ebé halo ita hamriik. Jezús husu ba menina ne'e nia aman buat ida de'it: “naran katak ó iha fiar”. Be ita fali, ita fiar duni?

2. Benefisiária na'in rua ba Jezús nia asaun iha Evanjellu ohin iha buat rua iha komún: ida uluk moras husi kedas tinan 12 no feto-oan ne'e mate ho tinan 12, idade ne'ebé halo nia sai feto. Iha povu Izraél, feto rua ne'e nia dalan hatudu frakasu ida. Ida kona moras ida, hanesan Sara, Abraun nia feen, iha parte fekundidade nian: nia lakon ninia raan, prinsípiu

moris nian iha mentalidade semítika. Ida fali lakon nia vida, presizamente iha idade ne'ebé prepara nia atu tranzmite moris (sira iha tradisaun atu kaben sedu liu). Kristu kura fetu rua ne'e hotu nune'e, halo sira bele assume sira-nia vokasaun maternál.

Feto rua ne'e reprezenta Kreda, iha ninia vokasaun maternál atu fó no haburas moris iha Kristu. Aluzaun ba mistériu santu sira Kreda nian orienta relatu nia komprensaun: Jairo husu Jezús atu tau liman, hodi salva no fó moris ba nia oan fetu. Ora, preparasaun hotu ba Batizmu marka ho impozisaun liman sira nian. Jezús halo fetu-raan ne'e hamriik, hodi fó liman ba nia, hanesan diákonu halo sai husi batizadu ida husi bee, hodi kaer nian liman, atu nia bele hadeer ba vida iha maromak. Hafoin, tuir mai Jezús husu, atu fó han ba fetu-raan ne'ebé foin moris-hi'as husi mate: ne'e aluzaun id aba Eukaristia ne'ebé mai tuir Batizmu.

3. Billete Evanjellu nian: transormasaun liuhusi fiar. Xefe ida sinagoga nian monu ain no harohan ba Jezús atu kura nia oan... Feto ida ne'ebé atinje emorrajia la dehan buat ida, nia hanoin iha nia an natón de'it atu kona Jezús nia hatais, konserteza tanba nia konsidera nia an la moos (impura). Buat ne'e natón ba Nia ne'ebé mai atu foti sa'e, kura, salva humanidade ne'ebé kanek. Reasaun ne'ebé akompaña Jezús oiain de'it. Balun hamnasa Nia. Fiar de'it maka solisita sinál ida Jezús nian, Jairo nia fiar, fetu nia fiar, Pedro, Tiago, João nia fiar...

No fiar ida-ne'e halo Jezús atua no transforma benefisiáriu sira: fetu sai isin di'ak, fetu-raan hamriik husi maten, testemuña sira hakfodak. Bele dehan katak Jezús la'ós taumaturgu ida: sira ne'ebé fiar maka rekoñese nia, nia rekomenda maka'as atu ema ida la bele hatene, ho reseiu, laho dúvida, atu ema sira valoriza maka sinál sira hodi la haree ho matan fiar nian.

4. Momentu rona Maromak nia Liafuan... Ita haree Jezús hale'u ho tarutu no ema lubun boot. Liután, iha rumór ne'ebé sirkula hela: Jezús atu halo milagre ida, kura jairo ni aoan fetu-raan! Ema lubun boot hanehan Jezús. No haree bá fetu ida hakarak hakbesik Jezús ho kbiit tomak, atu pelumenus kona ninia hatais sira. Nia hakarak sai mós benefisiária kbiit ne'ebé mai husi Maromak nia emar ne'e, hetan isin-di'ak husi moras ne'ebé kona nia ba tinan 12. Ita hatene diálogu ne'ebé tuir... Buat hanesan akontese ho Jairo ne'ebé hakbesik daudaun... Iha ema lubun boot nia klaran Jezús matan-moris ba ema konkretu sira, manifesta disponibilidade estraordinária, atensaun maka'as ba ninia prezensa. La iha ema ida sai anónimu ba jezús. Maromak nia domin ba nia oan sira horik iha nia. Iha Aman ninia Fuan laran, Jezús iha kbiit ba atensaun boot ba ema nia susar ida-idak. La iha interese sé mak mai besik Nia, la importa sá loos ninia situasaun; sé mak mai nia simu nafatin, Jezús fó nafatin ninia atensaun hanesan ema ida-ne'e mesak de'it mak iha mundu ho Nia. Buat ida-ne'e kontinua nafatin,oras-ne'e ne'ebé nia iha ona nia Aman nia glória tomak. Se ha'u mós hahú halo silénsiu iha ha'u an atu bele rona di'ak liután Jezús, liuhusi ninia Liafuan, se ha'u iha tempu ba orasaun interiór, atu hakle'an ha'u-nia silénsiu interiór... konserteza ha'u sai disponivel liután, matan-moris liután ba em aseluk.

Nai Jezús haraik mai ha'u grasa silénsiu interiór nian ne'ebé hatene rona no hatene hadomi.